

2015-imut Aningaasanut Inatsisissatut Siunnersuut

(Aningaasaqarnermut Aatsitassaqaqarnermullu Naalakkersuisoq)

Akissuteqaat

(Aningaasaqarnermut Aatsitassaqaqarnermullu Naalakkersuisoq)

2. Aappassaaneerneqarnera**Aallaqqaasiut**

Aallarniutigalugu Aningaasaqarnermut Akileraartarnermullu Ataatsimiititaliap 2015-imut aningaasanut inatsisissatut siunnersuummik, Naalakkersuisullu allannguutissatut siunnersuutaasa matumani aappassaaneerneqarnissaanni peqqissaartumik sulisimaneranut qujaniarpunga.

Naalakkersuisut aappassaaneerinnittoqarnissaanut missingersuutitut ilanngussanut allannguutissatut siunnersuutitut 135-inik oqaasertaliussanullu allannguutissatut siunnersuutitut 7-nik saqqummiussaqaqarniarput.

Allannguutissatut siunnersuutit amerlanerpaartaat ukiumut 50 mio. kr.-inik sipaartoqarnissaanut siunnersuutit piviusunngortinnissaannut tunngassuteqarput, taakkunungalu allannguutissatut siunnersuutit katillugit 82-iusut saqqummiunneqarput.

Aningaasaqarnermut Akileraartarnermullu Ataatsimiititaliap aappassaaneerinnittoqarnissaanut isumaliutissiissutaa.

Aappassaaneerinnittoqarnissaanut isumaliutissiissummi Aningaasaqarnermut Akileraartarnermullu Ataatsimiititaliap sipaarutigineqartussatut siunnersuutigineqartut piviusunngortinnissaannut isummernissani pingajussaaneerinnittoqarnissaanut kinguartippaa.

Tamatuma saniatigut Aningaasaqarnermut Akileraartarnermullu Ataatsimiititaliap isumaliutissiissummi Naalakkersuisunut arlalinnik apeqquteqarpoq, tamakkulu tullinnguuttuni akineqassapput.

Konto pingaarneq 30.01.04 Namminersorlutik Oqartussat illuutaanik aserfallatsaaliuineq - Ilaqutareeqarneq-mut tunngatillugu apeqquserneqarpoq Naalakkersuisut isumaqannginersut aserfallatsaaliuinermit ilitsersuummik pisariaqartitsisoqartoq imaluunniit taanna siunnersortinit avataaneersunit suliarisariaqassanersoq. Tassunga atatillugu nalunaarutigineqassaaq Ineqarnermut, Sanaartornermut Attaveqarnermullu Naalakkersuisoqarfimmi sanaartornermut imikkoortotaqarfik aserfallatsaaliuinermit ilitsersuummik suliaqassalluni nukissaqarsimanngimmat. Taamaammat aserfallatsaaliuinermit ilitsersuummut taarsiullugu illuutigineqartut qanoq innerisa peqqissaartumik misissorneqarnissaat tunngavigalugu aserfallatsaaliuinissamut pilersaarummik tigussaasumik suliaqartoqarnissaanut siunnersortimik avataaneersumik isumaqatigiissuteqartoqarsimavoq. Aserfallatsaaliuinissamut pilersaarut Ilaqutariinnermut, Na-

ligiissitaanermut Isumaginninnermullu Naalackersuisoqarfimmit akuersissutigineqassaaq. Tamannalu tunngavigalugu pingajussaaneerinnittoqarnissaanut allannguutissatut siunnersuutunik saqqummiussisoqassaaq, missingersuutinullu ilanngussanut oqaasertaliussat allanngortinniarneqarumaarlutik.

Aningaasaqarnermut Akileraartarnermullu Ataatsimiititaliaq maj 2014-imi suliffissaaleqisut ikilisinniarnissaat siunertaralugu sanaartukkanut aserfallatsaaliuinissanullu suliassat immikkut ittut aallartinnissaannut immikkut aningaasaliisoqarnissaanik kr.-inik akuersissuteqarpoq. Aningaasaqarnermut Akileraartarnermullu Ataatsimiititaliamit apeqqutigineqarpoq sooq ukiut nikinneranni aningaasaliissutaasunit 57 mio. kr.-nit missaat kisimik atorneqarsimanersut.

Soorlu Aningaasaqarnermut Akileraartarnermullu Ataatsimiititaliamut ilisimatitsissummi nalunaarutigineqareersoq ukiut nikinneranni atuinerniit aningaasanik amerlanerujussuarnik immikkoortitsisoqarnikuuvoq. Taamaakkaluartoq eqqaasitsissutigineqassaaq pilersaarummik aallartitsisoqarniaraangat pilersaarutitut ataasiakkaanut pilersaarummut atortussanik suliqartoqartariaqartarnera. Pilersaarutittaaq amerlanersaat piffissami sivisunerusumi sularineqartarput, tamatumanilu ilaatigut silap allanngornera allallu eqqarsaatigisariaqarput. Suliassat ilaat ukiuunera aatsaat qaangiuppat sularineqarsinnaasarput. Nunalerinissat, qalipaanissat pappialarsualerinissallu issikkunnaaraangat aatsaat sularineqarsinnaaneri asser-suutissaapput. Tamatuma saniatigut sanaartornermut atortussat illoqarfinnut avannarpasin-nerpaaniittunut aatsaat siku aareeraangat umiarsuakkut anngunneqarsinnaasarput. Suliassat tamakku aallarteriaannaasaraluarput, sulinerulli aallartinnissaa upernaakkut imaluunniit aasap ingerlanerani aatsaat pisinnaasarluni.

Suliassat ilaat piffissami sivisuumi aalajaaatsumillu sularineqarnissaat anguniarlugu piffissami sivisuumi atorneqarnissaat pilersaarusiugaapput. Assersuutigalugu inissiani oqoqarne-
rup ingerlaavartumik akiorniarnissaa naatsorsuutaavoq.

Aammattaaq Aningaasaqarnermut Akileraartarnermullu Ataatsimiititaliamit atualertussat meeqqallu atuarfiisa qanoq innerinut nalunaarsuinissamut qanoq Naalackersuisut eqqarsaate-qarnermut, qanorlu piffissaliisimanersut paaserusunneqarpoq, tamakkumi aap-
passaaneerneqarnissaanni konto pingaarneq 84.40.10 Kommunini atuarfiit aqutugalugu sularineqarnissaannut allannguutissatut siunnersuummik saqqummiussisoqarsimammat. Illuutit qanoq innerinut nalunaarsuinermi anguniagaavoq illoqarfinni nunaqarfiillu 75 %-iini atualertussat meeqqallu atuarfiini tamani illuutit qanoq innerinut september 2015 naatinnagu nalunaarsuisoqassasoq. Nunaqarfinni illuutit qanoq innerinut nalunaarsuinissat 25 %-ii kingulliit 2016-imi aasartinnagu pinissaat ilimagineqarpoq. Piffissamulli pilersaarut eqqortinneqassappat apeqqutaassaaq illuutigineqartut, najukkani attaveqarfigisassat assi-gisaallu pillugit paasissutissanik piffissaq eqqorlugu kommunita ataasiakkaat nassiussisinnaan-
ersut. Naalackersuisut ajornartorsiutaasut qanoq annertutiginersut ilisimasaqarfiginngilaat, tamannalu tunngaviuvoq illuutit qanoq innerinut nalunaarsuisoqarnissaanut. Illuutigisat qanoq innerinut nalunaarsuisoqareerpat nalunaarsuineq tamanna atualertussat meeqqallu atuarfiini sanaartukkanut, aserfallatsaaliuineranut iluarsartuussinermullu akisussaaffiup assigiimmik inissinneqarnissaanut atorneqassaaq.

Pingajussaaneerinnittoqarnissaanut allannguutissatut siunnersuutigisassatut ilimagineqartut

Pingajussaaneerinnittoqarnerani Great Greenland A/S-imut aningaasaliisoqarnissaanut tunngatillugu allannguutissatut siunnersuummik saqqummiussisoqassasoq Naalakkersuisunit naatsorsuutigineqarpoq. Allannguutissatut siunnersuut taanna aqutugalugu ingerlatseqatigiiffiup akiitsui ernianut annertuumik aningaasartuuteqarfiusut atorunnaassapput, tamatumalu kingorna Naalakkersuisut naatsorsuutigisavaat ingerlatseqatigiiffik ajunnginnerusumik ingerlalersinnaassasoq.

Sanaartornerit eqqarsaatigalugit naatsorsuutigineqarpoq allannguutissatut siunnersuummik saqqummiussisoqarumaartoq, tamatumalu kingunerissavaa Nuummi nuna tamakkerlugu arsaattarfimmik sanasoqarnissaanut misissueqqaarnissanut aningaasanik immikkoortitsisoqarnissaa.

Aammattaaq 2015-imut aningaasanut inatsisissatut siunnersuut pillugu naalakkersuinikkut isumaqatigiinniarnertit naammassinerini angusarineqartut kingunerannik allannguutissatut siunnersuutinik saqqummiisoqarnissaa ilimanarpoq.

Naggasiineq

Tamanna nangillugu 2015-imut aningaasanut inatsisissatut siunnersuut pillugu naalakkersuinikkut isumaqatigiinniarnertit atatillugu ajunngitsumik angusaqarfiusumillu sulisoqarsimaneranut partiit tamaasa qujaffiginiarpakka. 2015-imut aningaasanut inatsisissatut siunnersuut pillugu isumaqatigiinniarnertit ingerlanneqarnerat naalakkersuisooqatigiit atuuffianni aningaasanut inatsisissat tullinnguuttut pillugit isumaqatigiinniarnissanut naleqqatut atorineqarumaarput.

Taamatut oqaaseqarlunga inersuarmi maani aningaasanut inatsisissaq pillugu ajunngitsumik angusaqarfiusumillu oqallittoqarnissaa qilanaaraara.